

Luz Cwngsin: Boux Daiqdaeuz Go Liuzhingz Vahcuengh

陆正信：壮语流行音乐的领航人

□ Veiz Yiveij raiz Dahdingz hoiz

Aen go 《Gou Daj Mbanjcuengh Daeuj》nde, ciengq ok vah ndawsim geijlai boux vunz Mbanjcuengh okrog buekguh haenx; aen go 《Goreux Haiva Couh Dauq Ranz》nde, gwnz muengx diemj dingq mauhgvag cien fanh vunzbaez; aen go 《Son Mwnz Gangj Vahcuengh》nde, hawj de miznaj ndaej ciengjim Guengjsae gaiq daihcibroek Betgveiq ginzsingh ciengj. De, couhwdg Luz Cwngsin, boux cauxguh go liuzhingz Vahcuengh gig ndaej bouxmaezgo Mbanjcuengh gyaemaij—deng gyoengq bouxmaezgo caenmaed heuh baenz “Daegsaenq iq Mbanjcuengh” haenx.

Hainduj ciengq go Vahcuengh: Gou daj Mbanjcuengh daeuj

“Gou daj Mbanjcuengh daeuj, ranz youq laj dinbya, daj iq ndaw ranz hoj, okrog bae dajgoeng……” Neix dwg goswz aen go 《Gou Daj Mbanjcuengh Daeuj》, de ciengq ok vah ndawsim ciencien fanhfanh boux vunz Mbanjcuengh okrog buekguh haenx. Doengzseiz, hix dwg gij ndwenngoenz caensaed gaxgonq Luz Cwngsin bae dieg henzhaij buekguh, daiqdaeuz hainduj ciengq go Vahcuengh haenx.

Luz Cwngsin doekseng youq aen mbanjbya iq Dava Yen Guengjsae ndeu, bi 2001 daj Guengjsae Yisuz Yozyen bizyez, bi 2004 vih gvaq ndwenngoenz, boux vunz dog byaij hwnj diuzroen bae Guengjdoeng buekguh. Gvaqlaeng 4 bi, Luz Cwngsin gonqlaeng youq ndaw yecungjivei、aenbah yienj dinfwngz、ciujbah Fuzsanh、Gvangjcough caeuq Sinhcin guh boux ciengqgo mbouj dingh. Bi 2005, hawsingz henzhaij hwnghwnj funghcauz go liuzhingz guekrog, boux ciengqgo mbouj rox ciengq gij go guekrog couh deng caenx daengz henzbien diuzsienq senglix bae.

Bi 2005 haemh ndeu, youq ndaw aen ciujbah Sinhcin ndeu, boux ciengqgo ndeu cingq yungh cungj vah hawj vunz lumj rox lumj mbouj rox, gig ndeidingq ndeu ciengqgo, bouxdingq mbouj rox goswz, hoeng cix deng gij singgo saengdoengh sim vunz de gamjdoengh, daihgya riengz yaem’wenq dopfwngz nyaunyau…… Neix cingq dwg aen ciengzgingj Luz Cwngsin geij bi haenx youq Sinhcin roemx biengz ndeu. Daegmbauq youq mbanjbya Guengjsae doekseng、mbouj rox gangj vahguekrog neix, haemh haenx youq ndaw ciengz aenhaemh ciengq hwnj go “Vahdaigoz”——Vahdaigoz caeuq Vahcuengh caemh dwg Dung Daiz yijcuz Cuengh Daij yijcuih, song cungj vah neix gig doxlumj, gizaed de dwg ciengq vahcoj bonjfaenh go Vahcuengh. Aen go Vahcuengh gag raiz ndeu ciengq liux, de cingq lau deng bouxdingq luenhnauh, siengj mbouj daengz laj daiz sing dopfwngz goksasa……

Bi 2006, Luz Cwngsin cienj bae

Gvangjcough buekguh, baez daih’it bungz daengz yinhyoz vangjdoxlienx. Cungj fuengsik cienzboq moq cienzboq ngaih、cienzgoek cauxguh cienhnoix、gisuz suijbingz iugouz mbouj sang neix, gig vaiq couh deng de dawzndei, caemhcaiq miz aen gien baengzyoux ndei ndeu. Luz Cwngsin sawq yungh gij fuengsik bonjfaenh caixhangz haenx bae gaij bien mbangj go liuzhingz, aeu de yungh hingz sik dienz swz Vahcuengh fanciengq okdaeuj. Doeklaeng cungj fanciengq depgaenj gyoengqvunz Mbanjcuengh neix loeklak ndaej daengz haujlai vunz doengzyieng youq rog haenx doxhap, yaepyet heiq vunz gwnz muengx hoengghwd hwnjdaej, miz le haujlai bouxmaezgo, giz louzvah yiebmienh aengo vanzlij miz vunz yungh Vahcuengh louzvah. Doeklaeng, lij miz vangjyouj yiedsim lienzhaeh daengz Luz Cwngsin, vih gij go de cauxguh haenx boiq sawmuq goswz Vahcuengh、boiq hwnj vehmienh MV, fatbough youq gwnz muengx.

Gingvavag geij bi youq rog youzlangh, Luz Cwngsin dauqdaej yawjraen, go Bouxcuengh cij dwg gaiq bonj anndang bonjfaenh, dwg gij hwnghat fuengyiengq bonjfaenh ceiq ndei. Ndigah, de gietdingh dauqma Mbanjcuengh hwnghat.

Hwng daengx Mbanjcuengh: Goreux haiva couh dauq ranz

“Roxgeiq ngoenzde fwn doek iq daeuj, daeggo yaek bae baihygae, dahnuengx soengq gou daengz laj goek goreux, ndawsim miz vah gangj mbouj liux, nuengx ha nuengx ha, youq ranz caj gou, daengz goreux haiva daeggo couh dauq ranz……” Neix cingq dwg duenh goswz ndaw aen go 《Goreux Haiva Couh Dauq Ranz》Luz Cwngsin cauhanduj ndeu. Bi 2008 seiz goreux haiva, Luz Cwngsin dauqma mbanjranz Guengjsae, byaij hwnj diuzroen dajcauh ciengqgo.

Luz Cwngsin dauqma daengz Guengjsae, gonqlaeng haeuj daengz lai aen funghranz cauxguh ciengqgo cauxguh go Vahcuengh. Bi 2009, aen go 《Goreux Haiva Couh Dauq Ranz》Vahcuengh cauhanduj de baez daih’it fat okbae, gwnz muengx diemj dingq aen go neix miz daengz cien baez fanh baez. Youh gingvavag geij bi roengzrengz cauxguh, de youq bi 2011 fatbough mbaw conhciz bonjfaenh go liuzhingz 《Go Dwg Ciengq Vahcuengh》, mbaw conhciz neix dwg youz de gag raiz、gag boiq diuh, hix dwg mbaw conhciz Vahcuengh cauhanduj Cungguek, ra ndaej diuzroen go Vahcuengh caeuq go daihneix giethab lo.

“Danghnaeuz gangj haujlai go Vahcuengh gwnz muengx lij daengx youq aen duenh genjdanh yungh Vahcuengh fanciengq, yienghneix gou gaenq byaij gonq yamq ndeu.” Luz Cwngsin naeuz, daj fatbough mbaw



▲ Sing go Vahcuengh haprwenz.

conhciz bonjfaenh daih’it hainduj, de gaenq yungh cienzbouh goengrengz bae haeujlaeg vatcimh、cingjleix caeuq cauxguh go Vahcuengh. Daengz seizneix, go Vahcuengh de cauhanduj miz 100 lai aen, gaiq go fanciengq hix yaek daengz 100 aen.

Go Vahcuengh daiqdaeuz: Son mwnz gangj Vahcuengh

“Baengzyoux ndiepgyaez miz seizheiq daeuj daengz Guengjsae, yawjyawj gaiq dieg funghgingj gyaundeix neix, lwgminz Bouxcuengh angqcoux mwnz, yiedcingz angqcoux mwnz……” Neix dwg duenh goswz ndaw aen go 《Son Mwnz Gangj Vahcuengh》nde, seizneix, aen go riuzcienz gig gvangq neix, gaenq bienqbaenz aen go gig youqgaenj youq mwh gak cungj vwnzva minzcuz yienjok hozdung. Bi 2012, aen go 《Son Mwnz Gangj Vahcuengh》Luz Cwngsin miznaj ndaej ciengjim Betgveiq ginzsingh ciengj. Cauxguh 12 aen go denyingj《Aen Dingzdingj》, vih diuzroen ciengqgo Luz Cwngsin byaij ndaej engq swnh dwkroengz giekladej, hix hawj diuzroen daiqdaeuz go Vahcuengh liuzhingz de yied byaij yied gvangqlangh.

Bi 2013, Luz Cwngsin youh doiok mbaw conhciz ciengqgo Vahcuengh cauhanduj daihngieih bonjfaenh《Maez Youq Mbanjcuengh》. Mbaw conhciz yungh《Maez Youq Mbanjcuengh》《Mbanjcuengh》《Va Hai Va Loenq》daengj go guh daiqbiuj neix, yungzhaeuj yaem’wenq fwen yienghnduj ndawbiengz Bouxcuengh, diuh go haprwenz youh unqswnh, caeuq funggek daihneix go liuzhingz mbaw conhciz daih’it gig mbouj doxdoengz.

Seizneix, Luz Cwngsin baengh song mbaw conhciz de, bienqbaenz boux daih’it suijbingz cauxguh go

Vahcuengh sang daengz gaep daengx guek fathengz haenx, gij go mbaw conhciz hix vih neix ndaej haeuj cangsouleog Bwzdu、QQ、Guzgouj caeuq gak aen KTV doxlienx daengj ciengqgo bingzdaiz. De roxnyinh miznaj dwk naeuz: “Hawj daengxgyoengq bouxmaezgo Vahcuengh youq ndaw KTV doxlienx daengx guek ndaej diemj ciengq go Vahcuengh gienh saeh neix, gou boux daih’it guh daengz lo!”

Seizneix, dieg guhhong Luz Cwngsin mboujdan cauxguh go Vahcuengh, lij bang doiok canghgo moq Vahcuengh, vih vunzmoq raiz go、bang vunzmoq daezhawj mbwndeih ciengqgo gvangqlangh. De daegbied iugouz vunzmoq gaej daengx youq aen duenh fanciengq go liuzhingz gwnz muengx ndwi, wnggai youq gwnz giekladej yenzsu Bouxcuengh dijbauj bae haeujlaeg gyagoeng go daihneix, yienghneix cij cau’ok go maenhndei caencingq miz yi yi、ndaej riuzcienz daengz coglaeng haenx.

Caijfangj sat gaxgonq, gicej cam aen vwndiz gvendaengz saeh bonjfaenh de ndeu: Ndwenngoenz bonjfaenh canghgo Vahcuengh ndeu, dwg baenzlawz ndei ne?

Luz Cwngsin baez riunyumj, caem yaep ndeu cij naeuz: “Go Vahcuengh liuzhingz yienznaeuz gaenq miz haujlai bouxmaezgo, hoeng seizneix dingz lai lij dwg dan yinx go Bouxcuengh. Caeuq canghgo Vahgun miz haujlai bouxmaezgo mbon cienz yawj hoihyienjciengq doxbeij, ndwenngoenz canghgo Vahcuengh lij gig nanzgvaq.” De dingz yaep ndeu naeuz, “Gou yaek laebdaeb roengzrengz, dawz go Vahcuengh doi daengz baihnaj seiqgyaiq cij dwg siengjmuengh ceiqlaeng gou.”